

ՀԱՅ ԳԱՂԹԱԿԱՆՈՒԹՅՈՒՆԸ ԷԳԵՅԱՆԻ
ՄԵՐՋԱՓՆՅԱ ՇՐՋԱՆՈՒՄ
(XIV — XVIII ԴԴ.)

Պատմ. գիտ. դոկտոր Ա. Ա. ԽԱՌԱՏՅԱՆ

Էգեյան ծովի մերձահայ գաղթավայրերի առաջացումը կապվում է հայ ժողովրդի դժվարին պատմական ճակատագրի, հայրենի երկրից հարկադրաբար գաղթելու իրողության հետ: Հայության զանգվածային տեղաշարժերի նոր փուլ սկսվեց Կիլիկիայի հայկական թագավորության անկումից հետո (1375 թ.), երբ ժողովրդի բազմությունները ոչ միայն գերեզմարվեցին, այլև տեղահանվեցին կամ գաղթեցին Ասիայի ու Եվրոպայի բազմաթիվ երկրներ: Այս ժամանակաշրջանում և հետագայում հայտնվում են նոր գաղթավայրեր՝ Ղրիմում, Լեհաստանում, Պարսկաստանում, Սև և Միջերկրական ծովերի առափնյա տարածքներում, Թուրքիայի փոքրասիական շրջաններում՝ ընդհուպ մինչև դրանց արևելյան մասը և այլուր: Հայ գաղթավայրերի տարածումը շարունակվել է դարերի վեր, նոր գաղթականությունները համալրել են հրեաները՝ բուն հայրենիքի ապրած սոցիալ-քաղաքական կատակլիզմների հետեւականքով:

Էգեյանի ծովամերձ շրջանների (Ջմյուռնիա, Մանիսա, Այտըն, Գուշատա, Մենեմեն, Գրգաղաձ, Դենիզլի, Նազիլի, Թիրա և այլն) հայ գաղթավայրերի կազմավորման մասին փաստական վկայությունները չեն անցնում XVI դարից այն կողմ: Ջմյուռնիայի հայկական գերեզմանատան ցայտ հայտնի ամենահին դամբանագիրը թվագրված է 1551 թ.¹: Ավելի ուշ՝ 1622 թ. են ավանդված ձեռագիր հիշատակարանները, որ վկայում է գաղթավայրի դերի և նշանակության բարձրացման մասին²:

Սակայն Ջմյուռնիայում հայ առևտրականների կամ առևտրական գաղութի գոյության փաստերը հայտնի են շատ ավելի հին ժամանակից: XIII դարի առաջին կեսին ապրանքափոխանակության աշխուժացումը Իկոնիայի ռումի սելջուկյան սուլթանության, Նիկեայի և Տրապիզոնի հունական կայսրությունների միջև՝ կարևոր խթան դարձավ լեվանտական առևտրի հետագա զարգացման համար: XIII դարում, ինչպես նշում է Հ. Մանանդյանը, հայ առևտրականները «ունեին այժմ համաշխարհային կապեր և մշտական հարաբերություններ լեվանտական առևտրական կենտրոնների հետ, որտեղ սելջուկյան արշավանքներից հետո գոյացել էին հայկական գաղութներ»³:

Ըստ Ա. Ալպոյաճյանի, Ջմյուռնիայում հայ գաղթօջախի կազմավորումը տեղի է ունեցել XIII դարի II քառորդին՝ կապված մոնղոլական արշավանքների հետ, որը գաղթերի մեծ հորձանք էր առաջացրել: «Այս գաղթականները, — գրում է նա, — հավանական է, որ մաս մը խուճապահար փախուստի ընթացքին առաջացած է մինչև Փոքր Ասիո արևմտյան ծայրը, Հոնիականի եզերքը՝ Ջմյուռնիա, որուն գաղութի հաստատությունը կկարծվի ժամանակակից է Չարմաղան թաթար զորապետին՝ Հայաստանի նվաճման թվականին, այսինքն՝ 1236-ին»⁴:

1 Չ. Քոռյան. Հայքի Ջմյուռնիա և ի շրջակայս. հ. Ա, Վիեննա, 1899, էջ 82:

2 Մաշտոցի անվ. Մատենադարան (ՄՄ), ձեռ. № 6332, էջ 513:

3 Հ. Մանանդյան. Քննական տեսություն հայ ժողովրդի պատմության. հ. 3, Երևան, 1952, էջ 166:

4 Ա. Ալպոյաճյան. Պատմություն հայ գաղթականության. հ. 2, Կահիրե, 1955, էջ 543:

Ժամանակի իմաստով Ա. Ալպոյաճյանի այս կոնկրետացումը մնում է ապացուցելի, մանավանդ սկզբնաղբյուրները Էգեյանի մերձակա տարածքը չեն նշում իբրև գաղթի վերջնական հանգրվան։ Մյուս կողմից, անհրաժեշտ է որոշակիորեն սահմանազատել առևտրական գաղութ և գաղթօջախ հասկացությունները, որոնք որակապես տարբերվում են միմյանցից։ Առևտրական խմբի (կամ խմբերի) հաստատվելը դեռևս չէր նշանակում, որ գաղթօջախ է կազմավորվել։ Խումբը (կամ խմբերը) որպես կանոն, փոքրաթիվ էր և պատահական միավորման բնույթ ունեւր։ Այդպիսի համախմբումը կատարվում էր զուտ առևտրի բերումով և նույնքան պատահական էր, որքան տարանջատումը՝ դարձյալ առևտրական գործառնությունների հետևանքով։ Մինչդեռ գաղթօջախը ենթադրում է նույն ազգությունը, լեզվին ու դավանանքին պատկանող շատ ավելի նշանակալի թվաքանակ ունեցող անձանց հանրություն, որը հանգրվանել է ոչ թե տարանցիկ առևտրականների, այլ բուն կեցության, մշտական բնակության անհրաժեշտությամբ, ունենալով իր սոցիալական որոշակի միջավայրը կամ դրա մոգելը⁵։ Միջնադարում հայ գաղթօջախները ոչ քիչ դեպքերում գոյանում էին առևտրական գաղութի հայտնությունից հետո և այս ընդհանրական երևույթի հարաբերությամբ Էգեյանի մերձակա տարածքի, մասնավորապես Զմյուռնիայի գաղթօջախը չի առանձնանում։ Նրա սկզբնավորման, ապա և հետագա պատմության շատ դրվագները ցույց են տալիս, որ այստեղ բնակություն են հաստատել այն շրջանների հայերը, որտեղից նախապես եկել էին իրենց հայրենակից վաճառականները։ Հետևաբար, Զմյուռնիայի հայ գաղթօջախի հաստատման ժամանակը չպետք է նույնացնել առևտրական գաղութի ստեղծման ժամանակի հետ՝ վերջինս նախորդում է գաղթօջախի կազմավորմանը։ Պետք է ընդունել Հ. Քոսյանի կարծիքը, ըստ որի, գաղթօջախի կազմավորումը տեղի է ունեցել XIV դարի վերջին քառորդին, Կիլիկիայի հայկական թագավորության անկումից հետո⁶, իսկ ինչ վերաբերում է առևտրական գաղութին, ապա այն կարող էր գոյացած լինել XI—XII դդ. սելջուկների ժամանակից ի վեր։

Զմյուռնիայում «վաճառականության և գաղթականության մեջ հաջողակ հայերի» մասին առաջին տեղեկությունը տրվում է 1261 թ. մարտի 13-ի՝ Միքայել Պալեոլոգ կայսեր և ճենովացի առևտրականների միջև կնքված մի դաշնագրի տեքստում (ըստ Բ. Սլարսի)⁷։ Այս ժամանակաշրջանում Զմյուռնիայում կանգառած հայ վաճառականները եկել էին Ջուդայից, նախնիականից ու Ագուլիսից և ուղղակի կապված էին Ջենովայի ու Վենետիկի վաճառականների հետ⁸, նիկեայի հունական կայսրությունը, որի մեջ մտնում էր Զմյուռնիան XIII դարի սկզբին, առևտրի բարենպաստ պայմաններ էր ստեղծել մի կողմից իր տարածքով անցնող (Բրուսա, Ադրամիդա, Ֆիլադելֆիա) և արևելք ձգվող առևտրական ուղիների, և մյուս կողմից իտալացիների հետ առևտրի զարգացման համար։ Նիկեայի կայսրության առևտուրը սելջուկների հետ տարածվում էր Էգեյան ծովի առափնյա շրջաններից մինչև առևտրի փոքրասիական կենտրոնները⁹։ Զմյուռնիայում ապաստանած հայ առևտրականները այս ուղիներով կարող էին շրջանառության մեջ դնել փոքրասիական քաղաքներից իրենց տեղափոխած բեռները և առնչություններ ունենալ Զմյուռնիայից դեպի Մարմարա ծովն ընկած հատվածում երթևեկող իտալացի վաճառականների հետ։

5 Վ. Ջ. Սիրունին իրավացիորեն ամեն մի համախմբում գաղութ չի համարում։ Նա գաղթօջախը բնութագրող որակական հատկանիշ է դիտում «ազգային դիմագծությունը»՝ լեզուն, ավանդույթները և եկեղեցին (Վ. Ջ. Սիրունի, Պոլիս և իր դերը... «Էջմիածին», 1964, № 1, էջ 31)։

6 Վ. Քոսյան, նշվ. աշխ., էջ 39։

7 Ա. Մ. Իզմիրի ս. Լուսավորչյան հիմնադրամը։—«Արևելք», 1902, 13 փետրվարի։

8 Ա. Ալպոյաճյան, նշվ. աշխ., էջ 527։

9 В. Гордлевский. Избранные сочинения. Т. 1, М., 1960, с. 145.

Եթե XIII դարից հայտնի են Զմյուռնիայում գործող հայ վաճառականներ, ապա XIV դարի առաջին կեսին արդեն տեսնում ենք նաև հայ մտավորականի: Նկատի ունենք զմյուռնացի Նիկողայոս Արտավազդ Ռաբդասին, այն մաթեմատիկոսին, որին պատկանում է առաջինը քառակուսի արմատ դուրս բերելու պատիվը¹⁰: Ն. Ադոնցը կարծում է, որ Արտավազդը (ինչպես և նրան առնչվող մյուս երկու հայերը) պահպանելով իրենց ազգային անունները, դրանով ցույց են տալիս, որ «նոր են եկել Արևելքից և հնաբնակ շեն Բյուզանդիայում»¹¹: Իրողությունը մենք էլ այն, որ Արտավազդը պահպանել է և՛ հայկական անունը և իր քաղաքի (չի բացառվում՝ ծննդավայրի) հիշատակումը՝ իբրև անվան բաղադրիչ: Այս փաստը խոսում է այն մասին, որ նշված ժամանակաշրջանի Զմյուռնիայում հանդիպում են նաև ոչ վաճառական հայեր:

Զմյուռնահայ գաղթօջախի սկզբնավորումը կապակցելով Կիլիկիայի հայկական թագավորության վերացման հետ, Սլարսը (այնուհետև՝ Հ. Քոսյանը) որևէ սկզբնաղբյուր չեն նշում (Սլարսը հենվել էր զմյուռնացի մի քանի հնաբնակների և մտավորականների վկայությունների վրա): Նրանցից առաջ Հ. Դիմաքսյանը ևս կարծում է, որ զմյուռնահայերը «թերևս Կիլիկիո հայոց թագավորության ժամանակներն հոն գաղթած ըլլան»¹²: Ընդսմին, Հ. Դիմաքսյանը ևս հենվում է տեղացիների հին ավանդությունների վրա: Սակայն Կիլիկիայի հայերի գաղթը Զմյուռնիա շատ հավանական է թվում. թագավորության կործանումից հետո (1374), ինչպես գրում է Մ. Զամչյանը, հայ բնակչությունից «բազումը ևս վաղագույն աճապարեալ՝ խոյս ետուն յաշխարհս հեռաւոր ի կողմանս Փոքուն և Մեծին Հայոց և յերկիրն Վրաց և Ադուանից և ի սահմանս Յունաց և Պարսից ևս և ի կղզիս ցրուեցան յայլևայլ թագաւորութիւնս քրիստոնէից որոց թիւն եղեւ ըստ ոմանց իբր երեսուն հազար անձանց և ըստ այլոց աւելի յոյժ»¹³: Զմյուռնահայ գաղթօջախի պատմաբան Սլարսը կոնկրետացնում է գաղթի հանգրվանները՝ այդպիսիք համարելով մասնավորապես Իտալիան, Կիպրոսը, Հռոդոսը և Կրետեն¹⁴: Ա. Ալպոյաճյանը Սսից հիշյալ հայ գաղթականների գաղթը վերագրում է 1404-ին. նրա կարծիքով գաղթականների մի մասը անցել էր Եվրոպա՝ Իտալիա, Կիպրոս, իսկ մյուս մասը՝ փոքրասիական քաղաքներ¹⁵: Նա վկայակոչում է մի ժամանակագրություն, ըստ որի, Սսի հայերը՝ թվով 30 հազար տուն, 1413 թ. «մտեալ նաւ գնացին ի Ֆոանգս»¹⁶: Ավելի վաղ գրած իր հոդվածում Ա. Ալպոյաճյանը, հետևելով Թ. Զերմակյանին և Ատոմին, գրում է, որ զմյուռնահայ գաղթօջախը կազմավորվել է XI—XII դդ., թերևս ավելի վաղ¹⁷: Բայց այս տեսակետը չի բխում փաստական նյութից: Ատոմը իր կարծիքը կառուցում է XI—XII դդ. գաղթների ընդհանուր երևույթի վրա, որ համոզիչ չէ: Ա. Ալպոյաճյանը իր հերթին գրում է. «Վավերական աղբյուրներ և հիշատակարաններ թեև կպակսին, բայց գերեզմանաքարեր և իզմիրցիներու հասած լեզվի ինչ-ինչ երևույթները ցույց կուտան, թե իզմիրի հայերն ուղղակի Պարսկաստանի կողմեն գաղթած են ԺԱ կամ ԺԲ դարերուն մեջ և կամ ավելի առաջ»¹⁸: Սակայն զմյուռնացի հայերի ամենահին դամբանագիրը չի անցնում 1551 թ. այն կողմ: Ինչ վերաբերում է նրանց բարբառին, ապա պատկանելով «կը»

10 Ն. Ադոնց. Պատմական ուսումնասիրություններ. Փարիզ, 1946, էջ 536:

11 Նույն տեղում, էջ 537:

12 Հ. Դիմաքսյան. Շիթ մ'անունք ի Միչերկրական. Կ. Պոլիս, 1878, էջ 328:

13 Մ. Զամչյան. Պատմութիւն Հայոց. հ. 9. Երևան, 1984, էջ 359:

14 Հ. Քոսյան. Նշվ. աշխ., էջ 31:

15 Ա. Ալպոյաճյան. Նշվ. աշխ., էջ 549:

16 Նույն տեղում, էջ 499:

17 Թ. Զերմակյան. Զմյուռնիա և ազգայինը. — «Հանգես ուսուցիչ», 1890, № 4, էջ 83: Ատոմ. Նշվ. աշխ.: Ա. Ալպոյաճյան. Առաջնորդություն հայոց իզմիրի. — «Բյուզանդիոն», 1908, 23 ապրիլի:

18 Ա. Ալպոյաճյան. Նույն տեղում:

Ճյուղին և շափազանց նման լինելով Կ. Պոլսի ու հատկապես Եվդոկիայի բարբառներին¹⁹, այն իրոք պարունակում էր արևելահայերենի տարրեր։ Սակայն խնդիրն այն է, որ այդպիսիք զմյուռնահայերի բարբառը իր մեջ կարող էր ներառնել հետագայում՝ XVII դարում, երբ բազմաթիվ արևելահայեր գաղթեցին Ջմյուռնիա։

Թ. Ճերմակյանը հավանական չի համարում Կիլիկիայից հայերի գաղթը Ջմյուռնիա՝ 1375—1380-ի կողմերը, փաստարկելով էդեյանի տարածքների ոչ ապահով վիճակը։ Նրա կարծիքով, եթե այստեղ եկած առաջին հայ գաղթականները լինեին Կիլիկիայից եկած հայերը, ապա նրանք պետք է կապ պահպանած լինեին Սսի կաթողիկոսության հետ, մի բան, որ երբեք չի եղել²⁰։ Բայց 1375—1380 թթ., մինչև Լենկթեմուրի արշավանքը և Ջմյուռնիան գրավելը (1402) քաղաքում ամուր դիրքեր ունեին Հոռոտսի ասպետները, որոնք շնայած մահմեդական բեյությունների սպառնալիքներին, ստեղծել էին կայուն իրավիճակ և վերահսկում էին դրությունը։ Գաղթական կիլիկեցիները կարող էին ընդունել նրանց հովանավորությունը, բնակություն հաստատել այնտեղ՝ ընդգրկվելով պապական համագործակցության կղզիների ռազմաառևտրական հարաբերությունների ոլորտը և պաշտպանվելով մահմեդականների կեղծքումներից։ Ինչ վերաբերում է Սսի աթոռի հետ Ջմյուռնիա գաղթած սանցիների ենթադրվող կապերին, ապա XIV դարի երկրորդ քառորդից հետո քայքայված և ուժահատ ստական հոգևոր վերնախավը հաղիվ թե ուժ և հնարավորություն ունենար այդպիսիք հաստատելու։

Այսպիսով, հետադոտողները միասնական կարծիք չունեն Կիլիկիայից հայերի Ջմյուռնիա գաղթելու և դրա ժամանակի հարցում։ Սակայն հայերի գաղթը դեպի էդեյանի ափերը առավել հավանական է թվում 1375—1390-ի միջոցներին և ոչ ավելի ուշ։ 1390-ական թթ. երկարատև կռիվներ էին սկսվել փոքրասիական բեյությունների և օսմանյան սուլթան Բայազետի միջև²¹։ Ընկճված բեյությունների թուրքմեն տիրակալները կրկին գլուխ բարձրացրին Լենկթեմուրի արշավանքի ժամանակ, մասնավորապես Անկարայի հակառակորդի հետո (1402), որն ավարտվել էր թուրքերի ջախջախումով և սուլթանի գերեվարությամբ։ Դրանից հետո, մինչև XV դարի երկրորդ տասնամյակը շարունակվում էին բախումները թուրքմեն իշխողների (Սարուխանի, Այալունի, Գերմիյանի, Մենթեշեի և այլն) և Բայազետի ժառանգների միջև, ինչպես և վերջիններիս գահակալական կռիվները, որոնք անկման հասցրին բեյությունների տնտեսությունն ու առևտուրը²²։ Ի հետևանս և ի շնորհիվ այս ամենի, Ջմյուռնիայի և Մանիսայի շրջաններում 1410-ական թթ. ապստամբություն բռնկվեց²³։ Ռազմական չռադարող բախումներից անպակաս այսպիսի տարածքը չէր կարող հանգրվան դիտվել հայ գաղթականների համար։ XIV դարի վերջին քառորդին Կիլիկիայից եկած գաղթականները, մինչդեռ, Ջմյուռնիային կարող էին արդեն ծանոթ լինել դրանից շատ առաջ, երբ Վենետիկի և Զենովայի ռազմական ուժերին ապավինած հայերը

19 Ն. Ա. Մ. Մ. Մ. Հայ բարբառագիտություն.— էմինյան ազգագրական ժողովածու, հ. 6, Մոսկվա—Նախիջևան, 1911, էջ 239։

20 Գ. Պ. Պ. Մ. Մ. էդեյանի շրջանին՝ Ջմյուռնիան և զմյուռնահայ գաղթի մասին.— Մանուկ, 1972, 28—29 սեպտեմբերի։

21 Գ. Մ. Մ. Մ. Մ. Պատմություն Օսմանյան պետության. հ. Ա. Վենետիկ, 1841, էջ 43—44։ J. H. Uzuncarsilioglu. Anadolu beylikleri ve akkoyunlu, karakoyunlu devletleri. Ankara, 1937, s. 29—31, 53.

22 А. Д. Новичев. История Турции. Т. I, Л., 1963, с. 38.

23 Նույն տեղում։

գաղթում էին նրանց ենթակայության ներքո գտնվող շրջանները: «Արդեն հայք Կիլիկիո,— գրում է Ալիշանը,— իրենց տերութւյան վերջին տարինն ունենալով էին սփռուլ ինչպէս ի Հունաստան և ի կղզիս ծովամիջի Փոքր Ասիո և ոմանք ի Միտելենն գալով կու խնդրեին Հռոդոսի ասպետներեն և կընդունեին Կով (Լանկո) կղզվո մեջ երկիր, եկեղեցի և մշակութւյան եղենք և ալլն՝ համի 1366»²⁴:

2. Քոստանի մեջբերած՝ Զմյուռնիայի և Այտընի ամենահին դամբանագրերը վերաբերում են համապատասխանաբար 1551 և 1561 թթ.²⁵: Սակայն ավելի հին դամբանագրերի չհանդիպելը դեռևս չի նշանակում, թե այդ թվականներից առաջ էգեյանի ափերին հայ գաղթականներ չեն եղել: Կամ գերեզմանատներն են այլ վայրեր տեղափոխվել, և կամ հին գերեզմանաքարերն են մեկից ավելի անգամ գործածվել (իբրև նոր շիրմաքարեր և կամ եկեղեցու շինութւյան ու նորոգման նպատակներով):

Շարունակվել է արդյոք հայերի գաղթը էգեյանի ծովամերձ շրջաններ հաջորդ՝ XV—XVI դդ.: Այս դեպքում ևս ուղղակի փաստեր չկան, թեև որոշ հետազոտողներ հարցին դրական պատասխան են տալիս: Այսպես, Մակար վարդապետը գրում է, որ հայերը Նազիլի են գաղթել 400 տարի առաջ, այսինքն՝ XV դարի վերջին, Ագուլիսից, Ղարաբաղից, Ղափանից, Երևանից և այլն: Սակայն նա որևէ փաստ չի բերում այս տեղեկութւյան օգտին²⁶:

Զմյուռնիան և նրա շրջակայքը հայաշատ պետք է դառնային 1610-ական թթ. հետո²⁷, երբ ջալալիների ապստամբութւյուններից, սովից ու պարսկա-թուրքական պատերազմից պատուհասված բազմաթիվ հայեր անցան Միջերկրականի և էգեյանի ափերը: Այս ժամանակներից պետք է վերջնականապես կազմավորվեին Զմյուռնիայի և նրան կից բնակավայրերի հայ հանրութւյունները: 2. Դիմաքսյանը վկայում է Երևանից ու Ղարաբաղից գաղթած շերտի առկայութւյունը Զմյուռնիայում և նրա թեմերում²⁸: Ա. Բեկնազարյանցը գրում է, որ «այցեկուաց մատնանիշ են անում մանավանդ Զմյուռնիո ամբողջ վիճակի շիրմաքարերի արձանագրութւյուններն, հանգուցելոց գաղթած գավառների և գյուղերի անունները, որք են Ղարաբաղի Ղափան, Մեղրի ևն գավառների և Կալեր, Աշան, Կճողոտ, Հացի, Հաղրուք ևն գյուղերն»²⁹: Բազմաթիվ դամբանագրեր վկայում են, որ Զմյուռնիայի և նրա շրջակայքի (Բայանդըր, Նազիլի, Դենիզլի, Էյդեմիշ, Այտըն) հայ բնակչութւյունը գաղթել է Զանգեզուրից (Շաշկերտ, Շվանիձոր, Կալեր, Մանլե, Դումարք, Զավնդուր, Ղափան և այլն), Զուղայից, Նախիջևանից և Արարատյան դաշտի այլ բնակավայրերից³⁰:

Դիպի էգեյանի ափերը դիմող գաղթականների մասին է վկայում 1608 թ. մի հիշատակարան, որտեղ գաղթի պատճառն է համարվում սովը. «Են ապայ յետ այնորիկ ցրուեցաւ ազգս Հայոց յերեսաց սովուն ի Պարսկաստան, ի Սսորեստան, ի Գուրջեստան մինչև հասին ի Ճորճէն, ի յԱփիսագ, ի Կաֆայ... Ոչ թէ մասնաւոր մի երկիր կամ երկու, այլ ընդհանրական՝ սկսեալ ի դրանէն Հոնաց և Ալանաց և ի լեռնէն Կովկասու մինչև ի Պոնտոս և յԾիփէսոս և ի Կապադովկիայ և մինչև ի Դամասկոս և ի Սիս և ի Միջագետս: Բոլոր Հայաստան ամենայն ցիր և ցան եղեն»³¹:

24 Ղ. Ալիշան. Հայ-վենետ. վեներտիկ, 1896, էջ 178:

25 2. Քոստան. նշվ. աշխ., հ. Ա, էջ 82—83, հ. Բ, էջ 25:

26 «Արևելյան մամուլ», 1879, № 3, էջ 436:

27 2. Քոստան. նշվ. աշխ., հ. Ա, էջ 39:

28 2. Դիմաքսյան. նշվ. աշխ., էջ 129, 143—144:

29 Ա. Բեկնազարյանց. Գաղտնիք Ղարաբաղի. Պետերբուրգ, 1886, էջ 241—242:

30 2. Քոստան. նշվ. աշխ., հ. Ա, էջ 85. հ. Բ, էջ 25—26, 51, 54. 69—70, 101: Նույնի՝ Ակնարկ մը հնութւյան բեկորներու.— Հանդես ամսօրյա, 1906, № 9—10, էջ 278:

31 Հայերեն ձեռագրերի ժէ դարի հիշատակարաններ (1601—1620 թթ.), կազմ. Վ. Հակոբյան, Ա. Հովհաննիսյան. հ. Ա, Երևան, 1974, էջ 289:

XVII դարի առաջին տասնամյակին Եփեսոս (Ջմյուռնիային կից) գաղթելու վերաբերյալ այս տեղեկությունը ապացուցվում է հետագա դիտարկումներով: 1910 թ. արձանագրվել է, որ Եփեսոսի ծոցում գտնվող Գուշատա (Սկալա Նովա) քաղաքի հայոց գերեզմանատան դամբանագրերը հասնում են 300 տարվա³²: Հ. Քոսյանը ևս նշում է, որ հայերը Գուշատա են գաղթել XVII դարում³³: Այսուհանդերձ, պետք է ասել, որ 1600-ականի վերջին Ջմյուռնիայի մերձակայքը անվտանգ չէր: Ի տարբերություն Կ. Պոլսի, որտեղ գաղթական հայերի բազմությունները եկել էին արդեն 1605 թ.³⁴, Ջմյուռնիան և նրա շրջակայքի բնակավայրերն ու քաղաքները այդպիսի հրեշտարվորություն չէին ներկայացնում: Այստեղ դեռևս շարունակվում էին ջալալիների հուզումները. առանձնապես ակտիվորեն էին գործում ապստամբների բազմահազարանոց զորախմբերը՝ Կալենդեր օղլուի, Կարա Սալիհի, Սալուռ Խալիլի գլխավորությամբ: Օսմանյան պետության համար լուրջ վտանգ էր ներկայացնում Կալենդեր օղլուն, որին դժվարությամբ պարտուխյան մուսուլման թուրքական զորահրամանատար Մուրադ փաշան³⁵, Նույն ժամանակներում էր գործում Ջանփուլադ Ալի օղլի փաշան կամ Թավուլը: Սա իր զորքով գրավել էր Հալեպը, ապա Սիսը, Ադանան, անցել Սեբաստիա և խորացել Փոքր Ասիայում: Թավուլը Քաեր էած աշխարհի մինչև ի մեծ ծովագերն Եփեսոս ի Ջմիուհն», — գրում է հիշատակագիրը³⁶: 1606 թ. կողմերը Թավուլն ասպատակում էր Խարբերդի շրջանում՝ անասելի շարիքներ պատճառելով հայ բնակչությանը: Քանզի ի յայս ժամանակիս, — գրում է հիշատակագիրը, — ելաւ նեռի որդին կոչեցեալն Թաուլ խիստ աւիրութիւն էառ յերկրիս Դարբերտու, Ե (5) ամիս ի դաշտըն նստաւ զգեղորայքն ալրեց, շինութիւն պականեցաւ³⁷: 1602 թ. գրիչ Մատթեոսը գրում էր, որ «շատ տեղիք աւերեցաւ ի ձեռաց իսմայելացոց, զի այս ամի Բ (2) անգամ երկիրս փախստական եղաւ» (իմա Խարբերդի բնակչությունը — Ա. Խ.)³⁸: Նշված տեղեկությունները կապվում են այն իրողության հետ, որ Ջմյուռնիային մոտիկ Մանիսա քաղաքի վերին թաղի հայերը Խարբերդցիներ էին: Գ. Շահինյանը և ապա առավել համոզությամբ Հ. Աճառյանը և Կաթողիկոսը նշում են, ելնելով լեզվական իրողություններից, որ այդ թաղի հայերը գաղթել են XVII դարի սկզբին՝ Խարբերդից³⁹: Չի բացառվում, որ նրանց մի մասը տեղահանված լինի հենց Թավուլի կողմից. վերջինիս երթուղին խոսում է այդ ենթադրության օգտին:

Մանիսայի և Ջմյուռնիայի՝ XVII դարի սկզբի գաղթականության վերաբերյալ լավագույն արժեքավոր են Միմեոն լեհացու տեղեկությունները 1609—1611 թթ. Նրա ճանապարհորդության ժամանակ՝ Եփեսոս — Մանիսա — Գելիպոլիս — Թեքիրդաղ — Նիկիա — Ջմյուռնիա երթուղով. «Եւ անտի եկաք ի մեծահռչակ քաղաքն Մանիսայ որ է թախտ շահաւատայից... Եւ էայր այս քաղաքս երեււ եկեղեցի հայոց, փայտէ տան պէս: Մինն ի վերն լեռանց վերայ և մինն ի դաշտն. կայր եպիսկոպոս մի անունըն Յակոբ Ֆրնոզցի և երկու է-

32 «Դաշինք», 1910, 10 ապրիլի:

33 Հ. Քոսյան. Հայք ի Ջմյուռնիա... հ. Բ, էջ 111:

34 Ժամանակագրություն Գրիգոր վարչապետի Կամախեցույ. Երուսաղեմ, 1915, էջ ԽԴ:

35 Գ. Այվազդոզլուի. «Տոմար», էջ 499: Naima. Annals of the Turkish Empire from 1591 to 1659. New York, 1973, pp. 360—361.

36 Մանր ժամանակագրություններ, XIII—XVIII դդ., կազմ. Վ. Ա. Հակոբյան. հ. II, Երևան, 1956, էջ 277:

37 Հայերեն ձեռագրերի Ժէ դարի հիշատակարաններ (1601—1620 թթ.), հ. Ա, էջ 215:

38 Նույն տեղում, էջ 79—80:

39 Գ. Շահինյան. Մանիսայի հայ գաղութին ծննդավայրը. — «Բյուրակ», 1889, № 31—32, էջ 504: Կայծառիկ և Աճառյան. Մանիսացիներն իբրեւ գաղթական Խարբերդի. — «Բյուրակ», 1899, № 25, էջ 403:

րէց և քանի հարյուր տուն հայի զոր սիրով ընկալան մեզ և յոյժ մեծարեցին», — գրում է նա⁴⁰:

Եկեղեցիների փայտաշեն լինելը վկայում է, որ գաղթականությունը նոր էր գոյացել. քարաշեն եկեղեցի կառուցելու համար ժամանակ էր հարկավոր, երբ պետք է ձեռք բերվեր տնտեսական կայունացում և բարեկեցություն: Հիւրավի, Մանիսայի քարաշեն եկեղեցին հիշատակվում է 1658-ից ոչ շուտ, մի հալածավորքում՝ «Յիշատակ է գիրս տէր Գրիգորին որ ետ ս. Լուսավորչին եկեղեցին թիվ ՌՃԷ (1658)»⁴¹: Պետք է կարծել, որ մանիսացիների՝ քարաշեն եկեղեցի կառուցելու գործը հապաղել էր 1630-ական թթ. էլիազ փաշայի ապստամբության պատճառով, որը իրեն հռչակել էր Մանիսայի կառավարիչ և թալանել տեղի ժողովրդին⁴²: Անկախ դրանից, պետք է եզրակացնել, որ Սիմեոն Լեհացու հիշատակած Մանիսայի հայերը գաղթել էին XVII դարի առաջին տասնամյակին, երկու թաղերն էլ գրեթե միաժամանակ, ընդ որում՝ Վերի թաղեցիները խարբերդցիներ էին:

Սիմեոն Լեհացու մյուս տվյալները բավական լույս են սփռում Ջմյուռնիայի գաղթավայրի վրա: Այստեղ, գրում է նա, «կայր հայոց եպիսկոպոս մի, հաբեղայ մի և էրէց մի, հարյուր տուն հայի և երկու եկեղեցի՝ մինն ի բերթն և մինն ի դուրս»⁴³: Եթե XVII դարի առաջին տասնամյակին ղմյուռնահայ գաղութը կազմված է եղել 100 տնից, ապա դժվար է ենթադրել նոր գաղթականության առկայությունը, որ ականառու է Մանիսայում: Զալաիների մեկը մյուսին հետևող ապստամբությունները ծանր հարված էին հասցրել ղմյուռնիայի առետրին, քաղաքը դարձրել անհուսալի և անապահով՝ գաղթականների համար: 1600-ական թթ. սկզբին, ինչպես գրում է հանապարհորդը. բնակիչների մեծ մասը լքել էր այրված քաղաքը⁴⁴, 1622 թ. ղմյուռնիայում և շրջակայքում խժոժություններ էին անում ապստամբ ենիչերիները՝ պատուհասելով քրիստոնյա երկրների հյուպատոսներին⁴⁵: Դրանից հետո էլ, 1630-ական թթ. Այսուրնի շրջանում գործում էին Կնալը օղլուի ապրստամբ ջոկատները և այլն⁴⁶:

ղմյուռնիայի հայ բնակչությունը մարդաշատ պետք է դառնար 1620-ականից ոչ շուտ, երբ դարասկզբից Հայաստանի տարբեր վայրերից Միջերկրածովյան և էգեյանի տարածքներում ապաստանած հայերն արդեն, որոշած պետք է լինեին իրենց վերջնական հանգրվանները: Հիւրավի, ղմյուռնիա այցելած Տավերնիեի տվյալներով 1631 թ. հայերի թվաքանակը հասնում էր 8000-ի (ընդհանուր բնակչությունը՝ 90000)⁴⁷: Բնականաբար, դարասկզբի 100 ընտանիքը երկու տասնամյակի ընթացքում այսչափ աճ չէր կարող տալ, որ և վկայում է ղմյուռնիա գաղթականության գալու մասին:

XVII դարի առաջին տասնամյակներին պետք է վերագրել հայ համայնքի գոյացումը ղմյուռնիայի մերձակա Մենեմենում: Մելքիսեթ կաթողիկոսի ժամանակ է կառուցվել Մենեմենի Ս. Սարգիս եկեղեցին⁴⁸: «Երեք հարյուր տարվա հնություն մը ունի Մենեմենի հայ գաղութը, որը Գաղատիո հսկա գաղութն անշատված հատված մըն է: Էնկյուրիի Քառասնից մենաստանին

⁴⁰ Սիմեոն դպրի Լեհացույ ուղեգրութիւն. Վիեննա, 1936, էջ 37:

⁴¹ Գ. Շա հ ի ն յ ա ն. եջվ. աշխ., էջ 12:

⁴² Rucaut. The History of the Turkish Empire. London, MDCLXXX, p. 35.

⁴³ Սիմեոն դպրի Լեհացույ ուղեգրութիւն, էջ 37—38:

⁴⁴ Sandys Travels Containing an History of the Oriental State of the Turkish Empire. London, 1673, p. 12.

⁴⁵ W. Eton. A survey of the Turkish Empire. New York, 1973, p. 163.

⁴⁶ Մ. Զ ու լ ա լ յ ա ն. Զալաիների շարժումը և հայ ժողովրդի վիճակը Օսմանյան կայսրության մեջ (XVI—XVII դարեր). Երևան, 1966, էջ 215:

⁴⁷ The six voyages of J. B. Tavernier. London, 1678, p. 313.

⁴⁸ «Արշալույս», 1908, 16 հունվարի:

ձեռագիրները այսօր Մենեմեն կգտնվին»,— գրում է Զմյուռնիայի «Դաշինքը»⁴⁹,

XVII դարի սկզբներին նշանակալի քանակությամբ հայեր կային Այստրնում: Այստրնը առաջնորդական նստավայր էր և պետք է նշել, որ այստեղ առավել մեծաթիվ հայ բնակչություն էր կենտրոնացած, քան Զմյուռնիայում (գոնե մինչև 1620-ական թթ.): Մակար եպիսկոպոսը գրում է, որ Հայաստանի տարրեր կողմերից գաղթած Այստրնի հայ բնակչությունը «երբեմն ավելի բազմաթիվ են եղել և առնվազն 500 տունն են կրաղկանային, ինչպես որ հին արձանագրությունները կվկայեն»⁵⁰,

XVII դարի 30-ական թթ. և դեռ դրանից հետո էլ Այստրնում գործել են հայ եպիսկոպոսներ: 1635 թ. հալեպցի Սարգիս երեցը Զմյուռնիայից գնացել է Այստրն, որտեղ Տրդատ եպիսկոպոսը նրան տվել է «զկարգ և զպատիվ քահանայութեան»⁵¹: Այստրնի ամենահին դամբանագիրը վերաբերում է 1561 թ.⁵², հետևաբար, հայերն այստեղ բնակություն են հաստատել XVI դարի առաջին կեսից ոչ ուշ⁵³:

XVII դարի առաջին կեսին Այստրնում հայտնվել է նոր գաղթականություն՝ ի դեմս Զանգեզուրից եկած հայերի⁵⁴: XVII դարի առաջին քառորդին Զմյուռնիա և շրջակայք գաղթած բազմությունների մեծ մեծամասնությունն են կազմել Մեղրու, Ղափանի, Սիսիանի, Արարատյան դաշտի հայերը, որոնք ցրվել էին Նազիլիում, Ագհիսարում, Պերկիում, Էյդեմիշում, Բերգամայում, Այստրնում, Գրգաղաճում, Թիրայում և այլուր: 1620-ական թթ. բարձրանում է Զմյուռնիայի Ս. Ստեփանոս և Ս. Բարդուղիմեոս եկեղեցու հեղինակությունը տեղի հայության մեջ և առհասարակ եկվոր վաճառականության շրջանակներում: 1625 թ. խոշա Ավետիքը մի ճառընտիր է նվիրել «յիշատակ ի դուռն յիզմիրայ ս. Ստեփանոս Նախավկային»⁵⁵, իսկ 1628 թ. մի այլ վաճառական՝ Զենապ Զելեպին ս. Բարդուղիմեոսի անվամբ ավետարան է նվիրել⁵⁶: Դարի երկրորդ քառորդին Զմյուռնիայի հայերի թիվը մեծացել էր. կրոնական որոշ հանդուրժողականությունը և առևտրի նպաստավոր պայմանները հայերին մղում էին մերձակա տարածքներից անցնել Զմյուռնիա: Ղափանի, Մեղրու, Սիսիանի և Ագուլիսի շրջաններից հայերի գաղթի գործում պետք է հաշվի առնել տեղական վաճառականների ընդարձակ կապերը Փոքր Ասիայի արևմտյան մասերի, արշիպելագի կղզիների և իտալական առևտրական կենտրոնների հետ: Հիրավի, այս ժամանակաշրջանի վենետիկի հայ գաղութում ազդեցիկ դեր են կատարել հատկապես մեղրեցի վաճառականները, որոնք այժի էին ընկնում, ի դեպ, իրենց առևտրական տների հարատևությամբ⁵⁷:

Զմյուռնիայի և նրա թեմերի գերեզմանատների դամբանագրերում արձանագրված են Զանգեզուրի բազմաթիվ գյուղերի անունները՝ հանգուցյալների ծննդավայրերը: Դրանցում հիշվում են Շաշկերտ (Շաշկետ, Շիշկետ ձևերով), Կալեր, Զավնդուր, Շվանիձոր, Մազրա, Ղմարք, Քուջերթ, Ղափան, Ափքես, Մանլե, Գիրաթաղ (Կերթաթաղ) և այլ գյուղեր⁵⁸: Ակներև է, որ այս գաղթականները եկել էին XVII դարի առաջին քառորդին և որ նրանց գաղթը

49 «Դաշինք», 1911, 18 փետրվարի:

50 «Արևելյան մամուլ», 1879, № 3, էջ 437:

51 ՄՄ, ձեռ. № 413, էջ 65:

52 Հ. Քոսյան. Հայք ի Զմյուռնիա..., հ. Բ, էջ 25:

53 Գ. Պոսյան. Նշվ. աղբ.— «Հառաջ», 1972, 24 հոկտեմբերի:

54 Հ. Քոսյան. Ակնարկ մը հեռության բեկորներու, էջ 278:

55 Հայերեն ձեռագրերի ԺԷ դարի հիշատակարաններ (1621—1640 թթ.), կազմ. Վ. Հակոբյան, Ա. Հովհաննիսյան. հ. Բ, Երևան, 1975, էջ 187:

56 Նույն տեղում, էջ 314:

57 Ղ. Ալիշան. Սիսական. Վենետիկ, 1893, էջ 301:

58 Հ. Քոսյան. Հայք ի Զմյուռնիա..., հ. Բ, էջ 25, 69—70, 101 և հտ.:

հայրենիքից խրախուսվել և նույնիսկ ուղղություն էր ստացել Զմյուռնիային վաղաժամանակ վաճառականների առաջնորդությամբ: Ուշագրավ է մի հիշատակարան՝ գրված «Ղնխոյ երկրում» (Գնըք, քաղաք Զմյուռնիայի մերձակայքում): Այն գրվել է ժիթուականության Հայոցս ՌԶԶ (1637), ի դառն և ի նեղ ժամանակի ալլազգաց Տաճկաց, զոր և մեզ հանդիպեալ սուրն վաղապետր պատենիցն մերկացեալ, նայև մեզ արմատախիլ արար ի բնական գաւառէ մերմէ և ի հայրական ժառանգութենէ: Քանզի էաք մեք յերկրէն Արարատեան ի Հայոց մեծաց ի հատէն սբ. Գրիգորի, և ի թէմէն լուսակառուց սբ. էջմիածնայ ի գեաղէն Թալին կոչեցեալ: Որ և իսկապէս թալանեցաք ի տեփական վիճակաց, տանց և ընթանաց, ազգաց և բարեկամաց, այլ և ամենայն իրաց: Ի պէսպէս վշտաց պատահեալ, բայց ողորմութիւնն Աստուծոյ պահեալ մինչև ցայժմ ի գերութենէ, քանզի մեզ սիրով բերին այսչափ ճանապարհս...»⁵⁹, Թալինցիների, ինչպես և մյուս գաղթականների (Զանգեզուրից) տեղաշարժերը եղել են կազմակերպված, գաղթողները կարողացել են խուսափել գերությունից: Իսկապես, 1635 թ. օգոստոսին թուրքերը գրավել էին Երևանը⁶⁰ և ավերածություններ էին անում Արարատյան դաշտում: XVII դարի առաջին քառորդում Զմյուռնիայում հաստատվել են նաև Արևմտյան Հայաստանից գաղթած բնակիչներ: Այս խմաստով ուշագրություն է գրավում Հ. Դիմաքսյանի գրառած մի դամբանագիրը՝ «Այս է տապան բաղրչեցի Յովհաննէսի որդի Աւագի կողացւոյն»⁶¹:

XVII դարի երկրորդ կեսին և դրանից հետո մինչև XVIII դարի 40-ական թթ. ավելի կամ պակաս հոսքով շարունակվել են Արևելյան Հայաստանի բնակչության գաղթերը դեպի էգեյանի ափերը: Թուրքիայի և Պարսկաստանի միջև կնքված Կասրե Շիրինի համաձայնագրով (1639) Արևելյան Հայաստանը դադարեց արյունահեղ բախումների ասպարեղ լինելուց, սակայն ժողովրդի տնտեսական ու կրոնական կեղեքումները չդադարեցին: Այս անգամ ևս անտանելի ճնշումներից աղատվելու նպատակով գաղթի ուղին բրունեցին Զանգեզուրի, Արարատյան դաշտի բազմաթիվ հայ բնակիչներ: Բերդամայի 1711 թ. մի հիշատակարանում հիշվում է Վարդան երեցը՝ Կարբից⁶², XVII դարի 40-ական թթ. Զմյուռնիա են գաղթել նաև կեսարացի հայեր: Կեսարացի «խոճա Մուրատը և Ճիհանշայն» Ս. Մտեփանոս և Ս. Բարդուղիմեոս եկեղեցուն են նվիրել Կեսարիայում գրչագրված մի ձեռագիր⁶³, նույն ժամանակներում Կեսարիայից Զմյուռնիա էր գաղթել էթիզյան ընտանիքը⁶⁴: Կեսարացիները ցրվել էին շրջակա քաղաքներում և ավաններում:

Շահ Աբասի ժամանակներից ի վեր և հետագայում շարունակվող գաղթերը ամբողջ XVII դարում և հետո, թվում է, մարդաշատ պետք է դարձնեին էգեյանի շրջանի հայ գաղթավայրերը: Մինչդեռ, գոնե Զմյուռնիայի վերաբերմամբ, այսպիսի աճ չի նկատվում: Ըստ Տավերնիեի, ինչպես վերը նշեցինք, 1631 թ. հայերի թիվը հասնում էր 8000-ի (ընդհանուր բնակչությունը՝ 90000): 1700—1714 թթ., ինչպես նշում են Ֆրանսիացի ճանապարհորդներ Ժ. Պ. Թուրնեֆորտը և ապա Պ. Լուկան, այդ քանակը մնում էր նույնը (ընդհանուր բնակչությունը՝ 100000)⁶⁵, 1731 թ. այդ թիվը նվազել հասել էր 7000-ի (ընդհանուր բնակչությունը՝ 76000)⁶⁶, Բնակչության, այդ թվում և հայերի

⁵⁹ Հայերեն ձեռագրերի ԺԷ դարի հիշատակարաններ. (1621—1640 թթ.), հ. Բ, էջ 704:

⁶⁰ Մատենադարանի պարսկերեն հրովարտական (1601—1650 թթ.), կազմ. Հ. Դ. Փառազյան. պր. 2, Երևան, 1959, էջ 26—27:

⁶¹ Հ. Դիմաքսյան. նշվ. աշխ., էջ 351:

⁶² ՄՄ, ձեռ. № 2129, էջ 29ա, 51ա:

⁶³ ՄՄ, ձեռ. № 6332, էջ 215ա—216:

⁶⁴ «Արշալույս», 1908, 1 մայիսի:

⁶⁵ J. P. Tournefort. Voyage d'un botaniste. Paris, 1932, p. 313. «Բնության պահանջներ». 1909, 24 օգոստոսի:

⁶⁶ Գ. Պոլյակ. նշվ. աշխ.—«Հառաչ», 1972, 30 սեպտեմբերի:

թվաքանակի նվազելու պատճառը Զմյուռնիայում մեկը մյուսին հետևող երկրաշարժերը, հրդեհներն ու համաճարակներն էին (1632 թ. հրդեհը⁶⁷, 1681 թ. սովը և երաշտը, 1688 թ. երկրաշարժը և այլն)։ «1688-ին այնքան ահռելի եղավ (երկրաշարժը—Ա. Խ.), որ քաղաքը բոլորովին կործանեցավ»,— գրում է Պ. Լուկան⁶⁸։ Զաքարիա սարկավազը խիստ տպավորիչ է ներկայացրել 1680-ական թթ. քաղաքում տարածված տարերային աղետներն ու համաճարակը⁶⁹։ Մի աղոթամատուցում (1703) Թումի որդի Զաքարիան գրում է. «Օվ սիրելիք, հալոք և եղբայրք, մի մեղալ տիր լերուք վասն պակասութեան կամ սղալութեան կամ ամենայն հարկի սորա, որ խիստ սըխլաթ տեղ գրեցանք, որ մահ եղեւ Իզմիր և փախանք...»⁷⁰, Պետք է նկատի առնել բուն իսկ ղմյուռնականների գաղթը Կ. Պոլիս, եվրոպական երկրներ և այլն, որ նոսրացնում էր տեղի հայության թիվը⁷¹։

Նոր գաղթները փոխհատուցելու էին այդ նոսրացումը։ 1720-ական թթ. պարսկական ժանր հարստահարումները և վերսկսված իրանա-թուրքական պատերազմները պատուհաս դարձան արևելահայ բնակչության համար։ «Երբ խայերն կտեսնեն, որ էլ ճար չկա, նեղութիւնն օրըստօրէ իվելանման ա, շատ գեղ և շատ մարդ խիզանով փախան գնացին օսմանցու երկիրն»,— գրում է Պետրոս դի Սարգիս Գիլանենցը⁷²։ Դավիթ բեկի հերոսական պայքարի շնորհիվ Ղափանում ժանր հարված հասցվեց մահմեդական զավթիչներին, սակայն Արարատյան դաշտում թուրքերը ասպատակում և գերեզմարում էին հայ բնակչությանը։ Գերվածներին վաճառում էին Կ. Պոլսի շուկաներում, ընդ որում, նրանց քանակն այնքան շատ էր, որ Կ. Պոլսի Կոլոտ պատրիարքը բողոքել էր մեծ վեզիր Իբրահիմին՝ «խափան դնել ահիրաւութեանցն այնոցիկ»⁷³։ Տեղահանված և փախստական բազմաթիվ հայեր էին կուտակվել 1727 թ. Կաբինում, Եվրոկիայում, Սեբաստիայում, Կոնիայում և այլուր⁷⁴։ Դրությունը փոխվեց 1732 թ., երբ հայ փախստականները հնարավորություն ստացան հեռանալ նպատակահարմար թվացող վայրերը՝ հաշտություն էր կնքվել թուրքերի և պարսիկների միջև։ «Զի բազում մարդիկ տնով չևեցին աստի, ոմանք գնալով Իզմիր, ոմանք Կոստանդինուպոլիս, և ոմանք ի Տրապիզոն, ոմանք Ղոբն և ոմանք այլուրեք»,— գրում է Հ. Վ. Ներսեսյանը Մխիթար աբբային⁷⁵։ Նամակը կարող էր գրվել և՛ Կարինից, և՛ Եվրոկիայից, ինչպես նկատում է Ա. Ալպոյաճյանը⁷⁶, հնարավոր է՝ նաև Կոնիայից կամ Սեբաստիայից, որտեղ կային ոչ քիչ թվով հայ փախստականներ։

Զանգեզուրում ազատագրական շարժման տեղատվությունից հետո խուսափելով պարսկական վայրագություններից, մարդիկ գաղթում էին հայրենի վայրերից։ 1730-ականի սկզբին Զմյուռնիա գաղթեց Նուպարյանների գերդաստանը, որը սերում էր Զավնդուրի Թորոս իշխանից⁷⁷։ Այս տասնամյակին ոչ քիչ խմբեր են անցել Թուրքիա, մասնավորապես

67 ՄՄ, ձեռ. № 6532, էջ 206։

68 «Բյուզանդիոն», 1909, 24 սեպտեմբերի։

69 Զաքարիա սարկավազի պատմագրություն. Վաղարշապատ, 1870, հ. 2, էջ 26։

70 ՄՄ, ձեռ. № 7002, էջ 3բ—4։

71 Թ. Ճեբրամական. Նշվ. աշխ., էջ 83։

72 Ժամանակագրություն Պետրոս դի Սարգիս Գիլանենցի.— «Կոնկ հայոց աշխարհին», 1863, № 3, էջ 201։

73 Գ. Ալպոյաճյան. Նշվ. աշխ., հ. Բ, էջ 173։

74 Ղ. Տալան. Մայր դիւան Մխիթարեանց Վենետիկի Ս. Ղազար. Վենետիկ, 1930, էջ 106։

75 Նույն տեղում, էջ 290։

76 Ա. Ալպոյաճյան. Պատմություն Եվրոկիո հայոց. Կահիրե, 1952, էջ 339։

77 Վ. Զարդարյան. Հիշատակարան. հ. Գ, Կահիրե, 1934, էջ 7—47։ Նույնի՝ Նուպար փաշա.— «Բյուզանդիոն», 1899, № 13, էջ 195—196։

Զմյուռնիա: Գործում էր հնուց ձևավորված գաղթի մեխանիզմը՝ զանգեզուր-ցինները կապեր էին պահպանում զմյուռնացի հայրենակիցների հետ:

1740—1750-ական թթ. շարունակվում էր Թուրքիայի հայ գաղթավայրերի համալրումը Արևելյան Հայաստանի բնակչությանը: Զենքի ուժով Պարսկաստանին կցած տարածքները պահպանելու նպատակով Նադիր շահը սաստկացրեց հարկահանությունն ու տնտեսական բռնության այլ միջոցները: Զհանդուրժելով անտանելի ծանր պայմանները, գրում է Խաչատուր Զուղայեցին, «բազումք յազգէս հայոց ետուն զամենայն ստացուածս իւրեանց և ինքեանք մերկք և կողոպուտք՝ անկան փախստական ի տար աշխարհ»⁷⁸, Նադիրի մահից հետո երկրում ծայր առած անկարգությունները ավելի ծանր դարձրին հայ բնակչության վիճակը, նորից ձգվեցին գաղթի անվերջանալի ճանապարհները դեպի Թուրքիա, Ռուսաստան և այլուր: Զմյուռնիան և շրջակայքը ևս անմասն չմնացին նոր գաղթականությունից: 1746 թ. այստեղ գաղթեցին Նախիջևանի հայ կաթոլիկները: Ղ. Ալիշանը գրում է, որ Նախիջևանցիների առաջնորդ Թովմաս Իսավերզեցը «յաջողեաց... բացի սակաւուց ոմանց զամենայն մնացեալսն, զծերս և զմանկունս և եռամսեայ դրժուարակիր և տառապագին ուղևորութեամբ հատանել անցանել ընդ բովանդակ Մեծ և Փոքր Հայս և հասուցանել ի Փոքրոն Ասիոյ ի Զմիւռնիա քաղաք հոգիս աւելի քան զհազար, ընդ որս եկին և սակաւք ոմանք ի հարց վանորէիցն այլ ոմանք ցրուեցան յարեւմուտս և ոմանք մնացին ի հայս»:⁷⁹ 1762 թ. Հռոմի ս. ժողովին ուղղած խնդրագրում ևս գաղթական շահեցիները մատնանում են իրենց նոր բնակչության վայրերը. «Վասն մեղաց մերոց, — գրում են նրանք. — բազմացան նեղիչք մեր, որ ոչ կարացաք տանել. վասն այսորիկ թողութ զհայրենի յերկիրն մեր և բնակութիւնն մեր եկաք աստ ի քաղաքն Իզմիր և մասն մի ի քաղաքն Թիւրաթիր (Թիւրատիր) որ եմք թվօվ 700 անձինք»⁸⁰:

Մի հայսմավորքի հիշատակարանից երևում է, որ գաղթել էին ոչ միայն Նախիջևանցի կաթոլիկները, այլև Երևանի ու նրա շրջակայքի հայ բնակչության մի մասը, և որ այդ գաղթեցող տեղի են ունեցել նույն ժամանակ՝ 1746 թ.: «Ի թուահաշուէն հայոց ԹՃՂԶ (1746) ամսեանն ապրելի ԺԱ-ին (21), որ էր ի ժամանակն պարսից անագորուն և անոպա Նադր շահին զոր յոյժ նեղութիւն ունէին պարսից իշխանութեան ենթ ժողովուրդօն թող զանիրաւ հարկապահանջութիւն զոր առաւել էր քան զառաջինսն յաւել ևս չար ի վերայ շարեաց և վէրք ի վերայ վերաց զոր Նախիջևանայ երկրին վերայ ձգեալ էին ԼԵՌ (35000) թումն և Երևանու երկիրն ԽՌ (40000) թումն: որ բազումք հանդերձ տամբք մեծաւ տառապանօք եղեալ ի տանց և ի հարենեաց փախան յերկիրն օսմանցոց», — գրում է հիշատակագիրը⁸¹, Մ. Թադիսեանի մի տեղեկությունից երևում է, որ Զմյուռնիա են գաղթել կարբեցիները. «Վերջին աւերած Կարբույ, — գրում է նա, — եղև յաւուրս Նադրաւ, արքայի պարսից, յորոց ի բնակչացն կէսք գնացին ի Զմիւռնիա, իսկ կէսքն ևկին յԵրևան»⁸²:

Անկասկած, այս տեղեկությունը համընկնում է վերոհիշյալ հայսմավորքի արձանագրած՝ 1746 թ. գաղթին: Կարբեցիները, ինչպես և երևանցի առևտրականները դեռ XVII դարում կարող էին ծանոթ լինել Զմյուռնիային, ճիշտ այնպես, ինչպես, ասենք, Զաքարիա Քանաքեռցին: Այս դեպքում ես կարբեցիների ընտրությունը պատահական չի եղել. 1705—1706 թթ. Եմեղօք լցեալ՝ կարբեցի Վարդան գրիչը թափառում էր Զմյուռնիայում, դրան

78 Խաչատուր Զուղայեցի. Պատմութիւն Պարսից. Վաղարշապատ, 1905, էջ 269:

79 Ղ. Ալիշան. Սխական, էջ 406, 407:

80 Հ. Աճառյան. Յուցակ հայրեն ձեռագրագ Նոր Բայազետի. — Շառնգես ամսօրյա, 1913, № 10, էջ 630:

81 Մ. Թադիսեան. Ուղեգրություններ, հոգվածներ, նամակներ, վավերագրեր. Երեւան, 1975, էջ 122:

կից Թուրքություն և Այսուրենում (Այուզեկ Հիսար)։ Նման դեպքերում գաղթա-
վայրի ընտրությունը կապվում է վաղեմի ծանոթությունների ու հարաբերու-
թյունների հետ, որի հիմքում ընկած էին վաճառականությունն ու առևտուրը։

1740-ական թթ. Էդեսիայի ափերն են գաղթել վայոցձորեցի հայեր։ Այս
ժամանակաշրջանում է, մեր կարծիքով, Դարալագյազի Մթնաձոր (Մատնե-
ձոր, Մտնաձոր) գյուղից Զմյուռնիա գաղթել մեկիք Վանին։ Սրա թողը՝
զմյուռնացի Մելիքյան Մկրտիչը հետագայի իր մի գրությամբ հայտնում էր
պապի անտերուռնչ մնացած ունեցվածքի մասին, որ լքվել էր «ի ժամանակս
Թահմազ Դուլի շահին, որ ի նազր շահն»⁸²։ 1745 թ. չղիմանալով պարսից
անագորույն լծին՝ Շիրակից Զմյուռնիա է գաղթում մեկիք Խանբաբը՝ դարձ-
յալ յուրայինների խմբով։ Սրա հետևորդները՝ Ստեփան և Խաչատուր Մե-
լիքսելումյանցները էջմիածնի սինոդին հղած դիմումի մեջ գրում են, որ
«Մեկիք Խանբաբ... չհանդուրժեալ յասպատակութեանց և ի բռնութեանց յերկ-
րին պարսից, խոյս տամ(ք)ք իւրովք յերկիրն օսմանցւոց ի քաղաքն յիզմիու-
նիա յամի տեառն 1745-ին»⁸³։ Նույն ժամանակներում Անիի կողմերից Զմյուռ-
նիա են գաղթել եղվարդդի Հովհաննեսը և նրա որդի Կարապետը, որոնց ու-
ղեկիցների թիվը հասնում էր մի քանի տասնյակի⁸⁴։

XVIII դարի կեսին չքավոր գաղթականների բնակության համար Զմյուռ-
նիայում հիմնվում է այսպես կոչված «օտալարը»՝ անշուք մի շինություն, ուր
ապաստանել են նաև տնանկ հիվանդները, ինչպես նշված է ս. Լուսավորչյան
հիվանդանոցի տեղեկագրում⁸⁵։ Գործում էր նաև հիվանդանոց՝ գաղթական
հիվանդներին խնամելու համար⁸⁶։ Հյուրանոցի և հիվանդանոցի գոյությունը
ինքնին վկայում է Արևելյան Հայաստանից գաղթածների բազմամարդության
մասին։

1740-ական թթ. Զմյուռնիայում հաստատվել են զգալի թվով հայ վաճա-
ռականներ. որոնք իրենց մասնակցությունն են բերել համայնքի հասարա-
կական ձեռնարկումներին։ Զմյուռնիայի Ս. Ստեփանոս եկեղեցու արձանա-
գրությունը վկայում է այդ իրողության մասին. «Ի թուին ՌՃՂԲ (1743) յու-
նիսի 15 Աստուծով և օծանդակութեամբ հոգւոյն սրբոյ սկիզբն եղեւ վերըս-
տին նորոգութեան ս. Ստեփանոս եկեղեցւոյս... արդեամբք և տրօք առհա-
սարակ ժողովրդոց լուսավորչածնից տեղացւոց և վաճառականաց եկաց և
բնակաց»⁸⁷։ 1755 թ. Աղեքսանդր կաթողիկոսը Զմյուռնիայի Իսահակ առաջ-
նորդին ուղղած կոնդակում տարբերակում էր «վաճառականաց բնիկ և մու-
սաֆիրներաց» (հյուրի. եկվորի իմաստով—Ա. Խ.), ինչը Ա. Ալպոյաճյանին
իրավացիորեն հիմք է տվել նկատելու, որ «միշտ բնիկներու և եկվորներու
խոսք մը կա, ինչ որ կրկին գաղթականությունները կմատնանշեն»⁸⁸։

Կոնկրետ վկայություններ այն մասին, թե արդյոք 1796 թ. Աղա Մահմադ
խանի արշավանքի ժամանակ հայերը գաղթել են Զմյուռնիա՝ մեղ չհաջող-
վեց գտնել։ Թեև 2. Քոստանը դա իրողություն է համարում, սակայն այդ
հաստատող որևէ վկայակոչում չի անում։ Ըստ երևույթին՝ նա հենվել է Կ.
վարդ. Շահնազարյանի՝ 1859 թ. հրատակարած Ստեփանոս Օրբելյանի «Պատ-
մություն» համար գրած առաջաբանի վրա։ Կ. Շահնազարյանը այստեղ նը-
կարագրում է Մարտիրոս արքեպիսկոպոսի՝ Զմյուռնիայի առաջնորդ նշա-
նակվելու նախընթաց դեպքերը։ Մարտիրոսը, գրում է նա, «ի գալ Աղա

82 ՄՄ, Կաթողիկոսական դիվան, թղթ. 248, վավ. 1096։

83 Նույն տեղում, թղթ. 169ա, վավ. 70։

84 ՄՄ, ձեռ. № 10272։

85 Ա տ ո մ. նշվ. աշխ.—«Արևելք», 1902, 22 մայիսի։

86 Նույն տեղում։

87 Տ. Պ ա լ յ ա ն. Գաղազնադիրք առաջնորդաց Զմյուռնիո.—«Դափնի», 1921, № 1, էջ
26—27։

88 Ա. Ա լ ա յ ա Ն. Առաջնորդություն հայոց Իզմիրի.—«Բյուզանդիոն», 1904, 12
ապրիլի։

Մահամատ Խանին ի 1245 թուին հայոց (1796) ընդ... Տաթևու գիւղացւոցն գնաց ի Նախիջևան և անտի ի սուրբ աթոռն էջմիածնի, ըստ որում ևս ընդ տէր Յակոբ քահանային՝ հօրն իւրոյ, գնաց ի Զմիւռին քաղաք, ըստ որում քնանիւմ երեւեալ յառաջմէ անդ էին գնացեալ» (ընդգծումն իմն է—Ա. Խ.)⁸⁹, «Յառաջմէ» ավելի շուտ կարող է նշանակել ոչ թե Աղա Մահմադ խանի ժամանակ, այլ դրանից առաջ՝ մեր կարծիքով, 1740—1750-ական թթ.։ Հիւրավի, հայերը Տաթևից Զմյուռնիա և շրջակայք էին գաղթել այս ժամանակաշրջանում։ Այսինքն շիրմաքարերից մեկը պատկանում է առաթևացի տէր Գեորգի որդի տէր Օվանեսին՝ ՌՄԺԲ (1763)⁹⁰։ Հենց այս գաղթականութիւնն է, որ Տաթևի վանքին կալվածքներ էր նվիրել Զմյուռնիայում և կից բնակավայրերում (Գրգաղաճ, Էյդեմիշ, Նազիլի և այլն)⁹¹։

XVIII դարի առաջին կեսին գաղթականները հաստատվում էին ոչ միայն Զմյուռնիայում, այլև նրա շրջակա բնակավայրերում։ Զանգեզուրի, Ղարաբաղի, Նախիջևանի բնակիչները, ինչպես նշում է Կ. վարդ. Շահնազարյանը, «լքին զարարս իւրեանց և գերկիր ծննդեան եւ անցեալ գնացին ոմանք ի Թուրքաստան, զտեղի կալեալ ի Զմիւռնիա, ի Կոստանդնուպօլիս, ի Պերգամ, յԵօտեմիշ, յԱղհիսար, այլք ի Շուշի, ի Տփիս, և մինչև Հաժտէրխան»⁹²։ Զմյուռնիայի շրջակայքի նշված բնակավայրերին պետք է ավելացնել Գըրգաղաճը, Նազիլին, Գուշատան, Գնըքը, Սյոքեն և այլն։

Այս ժամանակաշրջանի Զմյուռնիայի և կից շրջանների դամբանագրերը վկայում են ղափանցի, շաշկետեցի, կալբեցի, կարբեցի, երևանցի, երեւնեցի, մանլեցի, ափքեսեցի, նախիջևանցի և այլ եկվորների մասին, ամբողջովին կամ գրեթե ամբողջովին գաղթած այն նույն վայրերից, որոնք հիշվում են XVIII դարի շիրմաքարերի արձանագրութիւններում։ Հանդիպում են նաև խարբերդցիների, թոքատցիների, կեսարացիների և այլ շրջաններից եկածների շիրմաքարեր, որոնք համեմատաբար փոքրաթիւ են՝ դատելով ըստ Հ. Քոսյանի մեջբերումների⁹³։

Զմյուռնահայ գաղթօջախի վերջին համալրումը կատարվել է 1790-ական թթ., երբ Քրավական թվով կաթողիկեա հայ գաղատացի վաճառականներ իրենց բախտն ալլուր փորձելու համար թողած են իրենց ծննդյան վայրը և տնով-տեղով դիմած են Զմյուռնիա»։ Սրանց մի մասն անցել է Այսուրն⁹⁴։

Այսպիսով, էգեյանի մերձակա տարածքներում՝ Զմյուռնիայի և նրա թեմերի հայ գաղթավայրերում գաղթական հայերը բնակութիւն են հաստատել հետևյալ փուլերով. 1. Կիլիկիայի հայկական թագավորութիւն անկումից հետո, Կիլիկիայից, XIV դարի վերջին քառորդից, որ շարունակվել է մինչև XV դարի առաջին կեսը։ 2. XVII դարի երկրորդ տասնամյակից՝ Օսմանյան Թուրքիայում բռնկված ջալալիների ապստամբութիւն, Արևելյան Հայաստանում Շահ Աբասի գործադրած բռնագաղթների և տարածված սովի պատճառով, հիմնականում Զանգեզուրից (Մեղրի, Ղափան, Սիսիան), Խարբերդից և Արարատյան դաշտից։ Այս գաղթները մեկանգամյա ակտ չեն եղել, այլ ավելի կամ նվազ հոսքերով շարունակվել են մինչև XVIII դարի առաջին տասնամյակները։ 3. 1720-ական թթ. վերսկսված պարսկա-թուրքական պատերազմների ժամանակաշրջանից մինչև Նադիր շահի թագավորութիւն վախճանը և դրան հետևող տարիները (1750-ական թթ.)։ Այս երեսնամյակին

89 Հ. Քոսյան. Հայք ի Զմյուռնիա..., հ. Ա, էջ 113—114։

90 Նույն տեղում, հ. Բ, էջ 28։

91 ՄՄ, Կաթողիկոսական դիվան, թղթ. 167, վավ. 447, թղթ. 48, վավ. 221։

92 Ս տ ե փ ս ն ո ս Օ Ր Ր ե լ ե ա ն. Պատմութիւն նահանգին Սիսական. Փարիզ, 1859, էջ 30։

93 Հ. Քոսյան. Հայք ի Զմյուռնիա..., հ. Ա, էջ 90—96. հ. Բ, էջ 25—28, 52—55, 70, 86—93 և այլն։

94 Նույն տեղում, հ. Ա, էջ 320—321, հ. Բ, էջ 38—39։

հայերը գաղթել են Արևելյան Հայաստանի այն տարածքներից, որոնք ընդգրկում են Մեղրին, Ղափանը, Սիսիանը, Նախիջևանը, Ղարաբաղը, Երևանը և նրա շրջակա գյուղերը: 1730-ական թթ. էգեյանի ափերն են գաղթել նաև բավական թվով արևմտահայ գաղթականներ (Եվդոկիա, Կեսարիա, Խարբերդ և այլն): Հայ բնակչությունը Փոքր Ասիայի արևմտյան մասերում հայտնվել է հիմնականում կազմակերպված գաղթների ձևով, որ վկայվում է գաղթի մեկնակետի և հանգրվանի մեծ հեռավորությամբ, ինչպես և հայրենակցական համայնքների առկայությամբ (Զմյուռնիայում, Էյդեմիշում, Նադիրիում, Դուշապայում, Դենիզլիում, Մանիսայում, Ալտընում և այլն): Կազմակերպված գաղթերը նաև ցույց են տալիս, որ էգեյանի մերձակա շրջանների բնությունը՝ իբրև գաղթավայրի, պատահական չի եղել: Տվյալ գնալ-բերել, գոնե արևելահայ գաղթականների համար, էական նշանակություն է ունեցել Մեղրիի, Ղափանի, Նախիջևանի, Ազուլիսի և Երևանի հայ վաճառականության փորձը, որ նա ձեռք էր բերել XVI—XVII դդ. շնորհիվ փոքրասիական առևտրական ուղիների իր լավատեսականության: Հայ առևտրականության այդ իրազեկության ու կապերի շնորհիվ էգեյանի ափերը եկած հայ գաղթականները XVII—XVIII դդ. շարունակել են իրենց առևտրությունները: Բնաշխարհի ժողովրդի հետ, որը իր հերթին նախորոշել է հայ գաղթականների մոտքը այդ տարածքները:

МИГРАЦИЯ АРМЯН В ПРИБРЕЖНЫЕ РАЙОНЫ ЭГЕЙСКОГО МОРЯ (XIV—XVIII вв.)

Доктор ист. наук А. А. ХАРАТЯН

Резюме

В XIII в. в г. Смирне армянское купечество играло значительную роль, однако сведений о существовании там армянских поселений нет. В последнюю четверть XIV в. вслед за падением Киликийского армянского царства прибрежные районы Эгейского моря (г. Смирна с прилегающими районами) стали заселяться армянскими иммигрантами. В дальнейшем, в первой четверти XVII в., здесь образовались новые армянские колонии в результате восстания джалали в Османской Турции, насильственных переселений армян Шах-Аббасом и голода 1600-х гг. Армяне, мигрировавшие из Зангезура, Агулиса, Нахичевана, Харберда, Еревана и его окрестностей, поселились в Смирне, Айдыне, Манисе, Назилли, Денизли, Менемен и других поселениях. В результате возобновившихся ирано-турецких войн (1723 г.) начался следующий этап миграции, в основном с вышеуказанных территорий, а также из районов Арцаха, Кессарии, Евдокии и др. Немаловажную роль в миграции армян, длившейся до 50-х гг. XVIII в., имело международное торговое значение Смирны, в силу которого в известной мере сдерживалась мусульманская религиозная нетерпимость в г. Смирне и в его окрестностях.